

SEGURTASUN NUKLEARREKO KONTSEILUAREN ETA EUSKAL AUTONOMIA ERKIDEGOAREN ARTEKO EGINKIZUNEN AGINDUAREN HITZARMENA ZABALDUZ ALDATZEA

Madril, 2010eko azaroaren 25a.

HONAKO HAUEK BILDU DIRA:

Batetik, Segurtasun Nuklearreko Kontseiluko lehendakari Carmen Martínez Ten andrea, abenduaren 1eko 1450/2006 Errege Dekretuaren bitartez izendatua (2006-12-02ko BOE).

Bestetik, Eusko Jaurlaritzaren Industria, Berrikuntza, Merkataritza eta Turismo sailburu Bernabé Unda Barturen jauna, maiatzaren 8ko 10/2009 Dekretuaren bitartez izendatua (2009-05-09ko EHAA).

HONAKO HAU ADIERAZI DUTE:

Lehenengoa.- 1995eko ekainaren 28an, Segurtasun Nuklearreko Kontseiluak eta Euskal Autonomia Erkidegoak Eginkizunen Aginduaren Akordio bat sinatu zuten, Segurtasun Nuklearreko Kontseilua sortu duen apirilaren 22ko 15/1980 Legearen Hirugarren Xedapen Gehigarrian eta haren Estatutuaren (apirilaren 30eko 1157/1982 Errege Dekretuak onartu zuen) 11. artikuluan jasotako aurreikuspenekin bat etorritz.

Akordio horretan ezarri ziren Segurtasun Nuklearreko Kontseiluaren aginduz Euskal Autonomia Erkidegoak bete beharreko eginkizunak, baita jarduteko baliabideak eta moduak ere, honako hauek, funtsean: instalazio erradiaktiboak, instalazio horien babes erradiologikoko zerbitzuak eta erregai nuklearraren eta beste material erradiaktibo batzuen garraioa ikuskatzeko eginkizunak; instalazio erradiaktiboen baimen-eskaerak aztertu eta ebaluatzeko eginkizunak; eta ingurumeneko zaintza erradiologikoko eginkizunak; hori guztia Euskal Autonomia Erkidegoaren lurralde-eremuan.

Bigarrena.- 1996ko apirilaren 24an bi alderdiek Aginduaren Akordioa Indarrean Hasteko Akta sinatu zuten, eta, horri jarraiki, lehen etapa batean, agindutako eginkizunetako batzuk gauzatu behar ziren, eta beste batzuk, aldiz, atzeratu, Euskal Autonomia Erkidegoak eta Segurtasun Nuklearreko Kontseiluak aintzat hartu eta adostu arte egiaztatutako ikuskatzaileek gaia goitik behera menderatzen zutela eta Euskal Autonomia Erkidegoan abian zeuden instalazioekin ohituta zeudela.

Ondoren, 2012ko apirilaren 15eko lehen adendaren eta 2004ko martxoaren 12ko bigarren adendaren bitartez agindutako gainerako eginkizunak jarri zituzten abian.

Hirugarren adenda bat ere sinatu zen, 2007ko maiatzaren 9an, eta horren bitartez sistema informatiko bat ezarri zen bi alderdiek, baliabide telematikoa erabiliz, dokumentazioa elkartrukatzeko aukera izan zezaten.

Hirugarrena.- 2009ko ekainaren 24an, Eginkizunen Aginduaren Akordioaren Jarraipenerako Batzorde Mistoak bildu zen, eta bilera horretan (bileraren Akta 2009ko uztailaren 9an egin zen) zera erabaki zuten, 1995eko ekainaren 28an Segurtasun Nuklearreko Kontseiluak eta Euskal Autonomia Erkidegoak sinatutako Eginkizunen Aginduaren Akordioa aldatzea, instalazio erradiaktiboen langileen lizentziak izapidetzeko eginkizunak akordio horretara biltzeko, baita lizentzia horiek lortzeko prestakuntza-ikastaroen homologaziorako txostenak egiteko eginkizunak eransteke ere.

Laugarrena.- Aipatutako 1995eko Hitzarmenaren zazpigarren klausulan ezarritakoari jarraiki, hitzarmena indarrean hasi zenez geroztik hiru urte igarotakoan «hitzarmena berraztertu eta alda liteke, agindutako jarduera eta eginkizunak gauzatzeko hartutako esperientzia aintzat hartuta». Horren haritik aipatzekoa da eginkizun horiek eraginkortasunez bete direla, eta horri esker Euskal Autonomia Erkidegoak esperientzia handia hartu duela alor horretan azken hamabost urteetan; horrenbestez, bidezkotzat jotzen dugu 1995eko Aginduaren Akordio hori zabalduz aldatzea.

Aurrekoa gorabehera, eta agindutako eginkizunak betetzeko lortutako emaitzak bi alderdientzako onuragarritzat jo daitezkeela aintzat hartuta, Euskal Autonomia Erkidegoak eta Segurtasun Nuklearreko Kontseiluak honako hau.

ADOSTU DUTE:

1995eko ekainaren 28an Segurtasun Nuklearreko Kontseiluak eta Euskal Autonomia Erkidegoak sinatutako Eginkizunen Aginduaren Hitzarmena zabalduz aldatzeko Akordio hau sinatzea. Testu berria honela geratu da:

Lehenengoa.- Akordioaren xedea.

Akordioaren xedea honako hau da: Segurtasun Nuklearreko Kontseiluak Euskal Autonomia Erkidegoari klausula honetan jasotako eginkizunak bete ditzan agintzea, kasu kasu ezarritako baldintzetan, Segurtasun Nuklearreko Kontseilua sortzeko apirilaren 22ko 15/1980

Legearen bigarren artikulua b) c), d), e), f), g), h), i) eta l) idatz-zatietan jasotakoaren arabera.

Segurtasun Nuklearreko Kontseiluak une oro izango du Akordio honi jarraiki agindutako eginkizunak betetzearekin zerikusia duten zalantzak interpretatzeko edo argitzeko lagungarri izan daitezkeen irizpideak emateko aukera.

A) Kontrol-ikuskapeneko jarduerak:

Atal honetan honako hauek biltzen dira:

1.- Lehen (erregaiaren ziklokoak izan ezik), bigarren eta hirugarren kategorietako instalazio erradiaktiboak, fase guztietan. Diagnostiko medikorako X izpien instalazioak barne.

2.- Jatorria edo helmuga Euskal Autonomia Erkidegoan duten edo Euskal Autonomia Erkidegoan barrena mugitzen diren gai nuklear edo erradiaktiboak garraiatzea, hondakin erradiaktiboak barne.

3.- Instalazio erradiaktiboen eremuan jarduten duten babes erradiologikoko zerbitzuak.

4.- Diagnostiko medikorako X izpien ekipoen salmentako eta laguntza teknikoko enpresak.

5.- Ekipo edo material erradiaktiboen do erradiazioa sorrarazten duten ekipoen inportaziorako, esportaziorako, merkaturatzerako, transferentziarako edo laguntza teknikorako baimendutako entitateak.

6.- Instalazio erradiaktiboen, eta babes erradiologiakoaren eremuan eta gai nuklear edo erradiaktiboen garraiobideen garapenean jarduten duten enpresen eremuan gertatzen diren gorabehera, larrialdi edo salaketen ondoriozko ikuskapenak.

Ikuskatze-jarduerak honako hauek dakartzate berekin:

1.- Interesdunentzako akten administrazio-izapidetzea, aktak sinatzeko eta alegazioak aurkezteko.

2.- Akten ebaluazioa (gai nuklear edo erradiaktiboen garraioen ikuskapenekin zerikusia dutenak izan ezik).

B) Bigarren eta hirugarren kategorietako instalazio erradiaktiboen baimenatarako eta ekipoen edo material erradiaktiboen edo erradiazioa sorrarazten duten ekipoen inportaziorako, esportaziorako, merkaturatzerako, transferentziarako edo laguntza teknikorako (instalazio nuklear eta erradiaktiboei buruzko erregelamendua onartzen duen abenduaren 3ko 1836/1999 Errege Dekretuaren 74. artikulua) eta jardunbide-salbuespenatarako (Erregelamendu horren l.g) eranskina) baimenatarako ebaluazioak eta irizpen teknikoak.

Ebaluazio-jarduerak honako hauek dakartzate berekin:

1.- Informazio osagarria eskatzea eta ebaluazio-aginduen eraginpeko instalazio edo entitateen titularrekin harremanetan jartzea, instalazioak baimentzearekin eta instalazioen funtzionamenduaren jarraipenarekin zerikusia duen guztian.

2.- Instalazio erradiaktiboen nahitaezko ikuskapena, instalazioak abian jarri, aldatu eta itxi aurretik.

3.- Instalazio edo erakundeek Segurtasun Nuklearreko Kontseiluari aldian-aldian bidali beharreko txostenak ebaluatzea, eta betebeharrak hori eta horretatik eratorritako jardunak betearazteko eskaera egitea.

4.- Ikuskapen-akten ebaluazioa eta akta horien edukiaren haritik datozen jardunak egitea.

5.- Hala badagokio, behartzeko ohartarazpen eta isunak ezartzea, eta dagozkien zehapen-espedienteak irekitzeko proposamenak egitea. Euskal Autonomia Erkidegoak izendatutako organoak bete behar ditu proposamen horiek, baina Segurtasun Nuklearreko Kontseiluak horien aurkako jarraibideak eman ditzake. Xede guztietarako, Segurtasun Nuklearreko Kontseilua da neurri horren arduraduna.

6.- Gertaera edo gorabeheren haritik datozen txostenak lantzea eta ekintzak egitea.

C) Langileen lizentziak eta ikastaroak:

Atal honetan honako hauek biltzen dira:

" 2. eta 3. kategorietako instalazio erradiaktiboen operadore eta ikuskatzaileen lizentziak emateko eta berritzeko proposamenerako beharrezko proba, azterlan, txosten eta ebaluazioak egitea.

" Lizentzien epaimahaietako kideak izendatzeko proposamena.

" Instalazio erradiaktiboen operadore-lizentziak lortzeko programa akademikoen eta prestakuntza- eta hobekuntza-ikastaroen homologazio-proposamenerako beharrezko azterlan eta ebaluazioak egitea, eta homologatutako ikastaroak ematen direla eta ikastaro horietan aurreikusitako nahikotasun-probak egiten direla ikuskatu eta kontrolatzea.

Lizentziak emateko, homologatzeko eta ikastaroak ikuskatzeko proposamenarekin zerikusia duten jarduerak honako hauek dakartzate berekin:

1.- Informazio osagarria eskatzea eta eskatzaileekiko harremana, lizentzia emateko edo homologatzeko izapidearekin zerikusia duen orotan.

2.- Homologatutako ikastaroen funtzionamenduaren jarraipena egitea eta ikastaroak betetzeari buruzko txostenak egitea, ekintza zuzentzaileak proposatzea barne.

3.- Hala badagokio, homologazio edo lizentziak baliogabetzeko proposamena.

4.- Hala badagokio, behartzeko ohartarazpen eta isunak egitea, eta dagozkien zehapen-espedienteak irekitzeko proposamenak.

D) Ingurumeneko zaintza erradiologikoa:

Atal honetan honako hauek biltzen dira:

1.- Erkidegoan ingurumeneko zaintza erradiologikoa egitea, Kontseiluak xede horretarako Espainiako lurralde osorako ezarritako edo onartutako programekin bat etorriz, bi alderdiek adostu beharreko baldintzetan.

2.- Erkidegoak, bere ekimenez, eremu horretan programa espezifikoak egiteko erabakia hartzen badu, Kontseiluak programa horietan parte hartzeko aukera izango du, bi alderdiek adostu beharreko baldintzetan.

E) Larrialdietarako laguntza.

Segurtasun Nuklearreko Kontseiluak agindutako eginkizunak garatzeko ardura duen Euskal Autonomia Erkidegoko unitateari atxikitako teknikariek Larrialdiei Erantzuteko Erakundeari lagunduko diote honako jardura hauek garatzeko lanetan:

1.- Esku-hartzea eskatzen duen ustekabeko egoeraren ondorioak arintzeko beharrezkoak diren jardunak ikuskatu eta koordinatzea egoera horren eraginpeko eremuan, baldin eta Euskal Autonomia Erkidegoaren barnean badago.

2.- Larrialdiei Erantzuteko Erakundeari laguntza teknikoa ematea, baldin eta, larrialdi-egoera orokorra izanik, larrialdi nuklear edo erradiologikoetarako planetan aurreikusitako baliabide guztien mobilizazioa eskatzen badu.

3.- Euskal Autonomia Erkidegoan esku hartzeko baliabideak prestatzea; zehazkiago, baliabide-inbentarioak, jarduleak prestatzeko planak eta jendeari informatzeko planak egitea.

4.- Kasuan kasu zehaztuko diren ikastaro, mintegi, ariketa eta simulazioetan parte hartzea, larrialdiak kudeatzeko eta larrialdiei behar bezala erantzuteko behar adina ikasteko eta behar adinako esperientzia hartzeko.

Larrialdi egoeretan Euskal Autonomia Erkidegoko teknikarien eta Larrialdiei Erantzuteko Erakundearen arteko elkarlanerako hartuko diren erabakiak Babes Zibileko Zuzendaritza Nagusiari eta Euskal Autonomia Erkidegoko Babes Zibileko erakundeari jakinaraziko zaizkio.

Larrialdi erradiologikoak gertatzean, Euskal Autonomia Erkidegoak laguntza eska diezaieke agindutako ikuskatzaileei, lehen iritzi bat osatzeko eta ustezko larrialdia Segurtasun Nuklearreko Kontseiluari berehala jakinarazteko, hartara inolako beharrik gabe giza baliabideak eta baliabide teknikoak mobilizatzen dituzten justifikatu gabeko alarmak saihesteko.

Euskal Autonomia Erkidegoak agindutako ikuskatzaileek Segurtasun Nuklearreko Kontseiluaren Larrialdiei Erantzuteko Erakundean eduki beharreko parte-hartzea jaso ahal izango da Segurtasun Nuklearreko Kontseiluak etorkizunean Euskal Autonomia Erkidegoan larrialdi erradiologikoei erantzuteko ardura dutenekin sinatuko dituen akordioetan.

Bigarrena.- Lege esparrua.

Agindu-akordio hau administratiboa da, eta hartan jasotakoaren arabera arautuko da, baita apirilaren 29ko 25/1964 Legean, apirilaren 22ko 15/1980 Legean eta horiekin bat datozen xedapenetan ezarritakoaren arabera ere, baita Herri Administrazioen Araubide Juridikoaren eta Administrazio Prozedura Erkidearen azaroaren 21eko 30/1992 Legearen 15. artikuluen arabera ere.

Hirugarrena.- Agindua gauzatzeko baliabideak.

Agindutako eginkizunak betetzeko, Erkidegoak honako hauek eduki beharko ditu:

a) Instalazio erradiaktiboen eta erradiodiagnostiko medikoko instalazioen, garraioen eta babes erradiologikoko zerbitzuen ikuskatzaileak, Eusko Jaurlaritzaren Industria, Berrikuntza, Merkataritza eta Turismo Sailaren Industria Administrazio eta Segurtasuneko Zuzendaritzako funtzionario izan beharko dutenak.

b) Baliabide pertsonal eta materialak, propioak eta hitzartuak, ingurumeneko zaintza erradiologikoa egiteko eta agindutako gainerako eginkizunak betetzeko.

Kontseiluak onetsi beharko du baliabide horien egokitasuna. Xede horretarako, a) idatz-zatian aipatutako ikuskatzaileek, edo Erkidegoaren mendeko langileek zein agindutako jarduerak egiteko Erkidegoarekin hitzarmenak egingo dituzten erakunde edo entitate zientifiko-teknikoen mendekoek titulazio eta prestakuntza egokiak eduki beharko dituzte, honako hauek hain zuzen:

" Ikuskatzaileek eta ikuskapenaren haritik datozen gainerako eginkizunen ardura duten teknikariek goi- edo erdi-mailako titulazio tekniko eta prestakuntza espezifiko egokia edukiko dute, Kontseiluak onetsita, eginkizun horiek betetzeko.

" Ingurumeneko zaintza erradiologikoari esleitutako langileentzako, 1.D) idatz-zatiaren arabera:

- «Landa»-laneko langileek, laginak hartzeko eta erradiazio-maila neurtzeko ardura dutenek, erradiazio-monitoreak erabiltzeko gaitasuna emango dien prestakuntza jaso behar dute.

- «Laborategiko» langileek, laginak irakurri, aztertu eta neurtu behar dituztenek, erradiazio-fisikako eta/edo erradiokimikako espezialitatea eduki behar dute.

Agindutako eginkizunen garapenean esku hartzen duten langileen eta Kontseiluaren artean sortzen diren harremanetatik ez da inolako eskubiderik eratorriko.

Laugarrena.- Agindua gauzatzean jarduteko modua.

Agindutako eginkizunak beteko dira Akordio honetan eta Segurtasun Nuklearreko Kontseiluak ezarritako prozedura-eskuliburuetan ezarritako irizpide orokorrei jarraiki.

Kontseiluak, bere Estatutuaren 11. artikuluan ezarritakoa betez, agindutako eginkizunen betetze-maila ikuskatuko du, eta, ikuskapen hori egiteko, arau, jarraibide, orientazio eta zuzenketak eman ahal izango ditu edo bestelako zuzentze- eta kontrol-baliabideak erabili, Kontseilua Sortzeko Legearen arabera Kontseilua delako segurtasun nuklearren eta babes erradiologiakoaren alorrean eskumena duen erakunde bakarra.

Xede horretarako, Kontseiluak zuzenean jo ahal izango du eginkizun horien ardura duten pertsona, instalazio eta lanetara, eta berehala jasoko ditu gerta litezkeen gorabeheren buruzko jakinarazpenak.

Kontseiluak eta Euskal Autonomia Erkidegoak informazioa eman behar diote elkarri, nahitaez, segurtasun nuklearren eta babes erradiologikoaren eremuan interesgarriak diren gertaera eta gaien inguruan, honako atal hauetan deskribatutakoaren arabera:

1.- Bat-bateko gertaera garrantzitsuei buruzko informazioa: Kontseiluak eta Euskal Autonomia Erkidegoak gertaera eta erabakien berri emango diote elkarri, biderik azkarrena erabiliz horretarako: telefonoa, telexa, telekopia eta abar.

2.- Komunikabideek hedatutako eta iritzi publikoan eragina izan dezaketen berriei buruzko informazioa: Kontseiluak eta Euskal Autonomia Erkidegoak faxa edo telefonoa erabiliko dute elkarren artean komunikatzeko, eta, ahal dela, baterako erantzun bat emango dute alde zurretik, eta, jarraian, beharrezkoa bada, informazio zehatzago bat.

3.- Euskal Autonomia Erkidegoan eragiten duten instalazio nuklear eta erradiaktiboen funtzionamenduari eta segurtasunari eragiten dioten gertaera tekniko garrantzitsuei buruzko txostenak: Kontseiluak gertatutakoari eta hartutako edo hartu beharreko neurriei buruzko txostena idatzi eta aurkeztuko du.

4.- Kontseiluak eta Euskal Autonomia Erkidegoak helaraziko dizkiote elkarri, halaber, segurtasun nuklearri eta babes erradiologikoari buruz emango dituzten argitalpenak eta bestelako dokumentuak, baita, beren eskumenak betez, gai horiei buruz prestatuko dituzten xedapen-proiektuak ere.

Bosgarrena.- Erregimen ekonomikoa.

5.1.- Agindu Akordio honen esparruan, Euskal Autonomia Erkidegoak agindutako eginkizunak betetzearen haritik datozen zergen diru-sarreretan parte hartzeko aukera izan dezan, Segurtasun Nuklearreko Kontseiluak Euskal Autonomia Erkidegoaren esku uzten du kontzeptu horregatik ematen dituen zerbitzuen tasak kudeatu, likidatu eta biltzeko lege eta arauz esleitu zaizkion eskumenak gauzatzea. Esku-uzte hori, Estatuaren eta Euskal Autonomia Erkidegoaren arteko lankidetzarako tresna den heinean, agindutako eginkizunen araubidearen eraginpean dago, baina horrek ez du esan nahi, inondik inora, Estatuak titulartasuna lagatzen duenik, ezta tasaren errendimenduari zerikusia duen bestelako xedapenik ere, Euskal Autonomia Erkidegoari beheko paragrafoetan onartu zaion parte-hartzeaz aparte.

5.2.- Aurreko paragrafoan aurreikusitakoaren arabera, Euskal Autonomia Erkidegoak ordainarazi egingo ditu honako zergapeko egitate hauei dagozkien agindutako jardunen tasak:

a) Instalazio erradiaktiboak ikuskatzea eta horien funtzionamendua kontrolatzea, erradiodiagnostiko-instalazioak barne. Erregai nuklearren zikloko instalazio erradiaktiboak kanpo uzten dira.

b) Gai nuklear edo erradiaktiboen garraioak ikuskatu eta kontrolatzea.

c) Ikuskatzea eta kontrolatzea, babes erradiologikoaren eremuan diharduten salmenta eta laguntza teknikoko enpresen eta babes erradiologikoko zerbitzuen funtzionamendu egokia bermatzeko.

d) Homologatutako ikastaroak ematen direla eta horietan bildutako nahikotasun-probak egiten direla ikuskatzea eta kontrolatzea.

e) Bigarren eta hirugarren kategoriako instalazio erradiaktiboen funtzionamendurako baimenak emateko beharrezko azterlanak, txostenak eta ikuskapenak, eta dagozkien aldaketak.

f) Bigarren eta hirugarren kategoriako instalazio erradiaktiboak ixteko baimenaren aurreko azterlanak, txostenak edo ikuskapenak.

g) Instalazio erradiaktiboen langileentzako programa akademikoak eta prestakuntza- eta hobekuntza-ikastaroak homologatzeko beharrezko azterlanak eta ebaluazioak.

h) Bigarren eta hirugarren kategorietako instalazio erradiaktiboen operadore eta ikuskatzaileen lizentziak emateko eta berritzeko proposamenerako beharrezko probak, azterlanak, txostenak eta ebaluazioak.

Euskal Autonomia Erkidegoak tasa horien haritik bildutako diru-kopuruen ehuneko laurogei jasoko du.

Gaian agindutako eginkizunak dituzten bi autonomia-erkidegok edo gehiagok aldi berean garraio berean jarduten badute, ordaindutako tasaren likidazioan baterako parte-hartzeak ezin izango du, inondik inora, horren ehuneko laurogei gainditu.

Ingurumeneko zaintza erradiologikoa, 1.D) idatz-zatiaren arabera: Hitzarmenaren arabera Euskal Autonomia Erkidegoak aldi berean egin beharreko jardueri dagokien urteko aurrekontua batera ezarriko da. Kontseiluak eta Euskal Autonomia Erkidegoak beren gain hartuko dute aurrekontu hori, adostuko duten proportzioan.

5.3.- Euskal Autonomia Erkidegoak hiru hilean behin likidatuko ditu Akordio honen 5.2 puntuan aurreikusitako zenbatekoak, eta Kontseiluaren esku jarriko du informazio guztia, behin izapide ekonomiko-administratibo guztiak egin ondoren.

5.4.- Akordioan aurreikutsita ez dagoen orotan, Akordio honen eraginpeko tasak Segurtasun Nuklearreko Kontseiluak eskaintako zerbitzuengatik tasa eta prezioei buruzko maiatzaren 4ko 14/1999 Legean, Tasa eta prezio publikoei buruzko Legean, Zergei buruzko Lege Nagusian eta gainerako xedapen osagarrietan ezarritakoaren arabera arautuko dira.

Seigarrena.- Jarraipenerako batzorde mistoa.

6.1.- Segurtasun Nuklearreko Kontseiluak autonomia-erkidegoei eginkizunak agintzeko irizpide orokorreki buruzko Dokumentuaren 5.1 puntuan ezarritakoa betez, Jarraipenerako Batzorde Mistoak ezarri da, Akordioa bete ahala sortuko diren gaiak aztertzeko eta oro har jarduteko, Akordioaren garapena bultzatzeko organoa den aldetik.

6.2.- aipatutako karguen titularrak diren pertsonak edo pertsona delegatuek osatuko dute Segurtasun Nuklearreko Kontseiluaren eta Euskal Autonomia Erkidegoaren arteko Eginkizunen Aginduaren Jarraipenerako Batzorde Mistoak:

" Segurtasun Nuklearreko Kontseilua:

- Idazkaritza Nagusia.
- Babes Erradiologikoko Zuzendaritza Teknikoa.
- Babes Erradiologiko Operazionalako Zuzendariordetza Nagusia.
- Erakunde Harremanetarako Buruzagitza.

" Eusko Jaurlaritza:

- Industria eta Energia Sailburuordetza.
- Industria Administrazio eta Segurtasuneko Zuzendaritza.
- Instalazio Erradiaktiboen Zerbitzuko Buruzagitza.

" Egiatzatutako ikuskatzailea.

6.3.- Jarraipen-bileren gai-zerrenda.

Bi alderdiek adostuta beren bileretan azter ditzaketen gaiez gain, honako hauek guztiak aztertuko dituzte: jardueren urteko plangintza eta aurreikuspenen betetze-maila, Euskal Autonomia Erkidegoaren Aginduaren kostuen eta Segurtasun Nuklearreko Kontseiluaren ordainketen aurrekontuen plangintza, eta Aginduaren garapenaren balioespen orokorra.

6.4.- Desadostasunak ebaztea.

Jarraipenerako Batzorde Mistoak aztertuko ditu Agindu Hitzarmenaren garapenean bi alderdien artean sor litezkeen desadostasunak, eta erakunde sinatzaileetako lehendakariak ebartziko dituzte, beste edozein foruri esanbidez uko eginez.

Zazpigarrena.- Informazioaren tratamendua eta kudeaketa telematikoa.

7.1.- Agindutako eginkizunak kudeatzeko, erakundeek informazioa elkartrukatu beharko dute, eta truke hori, datu pertsonalak babesteko, datu pertsonalak babesteari buruzko abenduaren 13ko 15/1999 Lege organikoan eta lege hori garatzen duen abenduaren 21eko 1720/2007 Errege Dekretuan jasotako eskakizunen arabera gauzatuko da. Horiek guztiak arautzeko,

Segurtasun Nuklearreko Kontseiluak eta Euskal Autonomia Erkidegoak protokolo berezi bat sinatuko dute.

7.2.- Gainera, informatika-sistema bat ezarriko da bi erakundeek, baliabide telematikoak erabiliz, sortutako dokumentazioa edo paperean edo euskarri elektronikoan jasotakoa elkartruka dezaten ahalbidetzeko, honako hauek kontuan hartuta:

" Bide telematikoak lehentasuna izango du bi alderdien artean dokumentazioa transmititzeko, eta paperean ahalik eta dokumentu gutxien elkartrukatzeko dituzte. Gainera, gune fisiko bakarra ezarriko da Agindu Akordioaren garapenari dagokionez paperean sortutako edo jasotako dokumentazio originala artxibatu eta gordetzeko.

" Euskal Autonomia Erkidegoari agintzen zaio paperean sortutako edo jasotako dokumentazio originala artxibatze eta gordetzeko gune hori eratu, kudeatu eta mantentzean. Berme egokiekin beteko dira eginkizun horiek guztiak, dokumentuen osotasunari, egiazkotasunari, kalitateari, babesari eta kontserbazioari dagokienez.

" Segurtasun Nuklearreko Kontseiluak bere gain hartu behar du Euskal Autonomia Erkidegoak baliabide telematikoak erabiliz euskarri elektronikoan transmititutako dokumentuen artxiboa eratze, kudeatzeko eta mantentzeko ardura.

" Euskal Autonomia Erkidegoak une oro bermatuko dio Segurtasun Nuklearreko Kontseiluari Eginkizunen Aginduaren Akordioaren garapenari dagokionez Euskal Autonomia Erkidegoak paperean artxibatutako eta gordetako dokumentazio originala eskuratzeko aukera.

" Segurtasun Nuklearreko Kontseiluak egiaztatu ahal izango du Euskal Autonomia Erkidegoak paperezko dokumentazio originala artxibatu eta gordetzeko ezarritako sistema ongi dabilela. Segurtasun Nuklearreko Kontseiluak Eusko Jaurlaritzari aukera emango dio une oro, baliabide telematikoak erabiliz euskarri elektronikoan transmititu dizkieten dokumentuak eskura ditzan.

" Segurtasun Nuklearreko Kontseiluak eta Euskal Autonomia Erkidegoak sinatutako eginkizunen Aginduaren Akordioa amaitzen bada, Euskal Autonomia Erkidegoak Segurtasun Nuklearreko Kontseiluaren esku jarriko du ordura artean artxibatutako eta gordetako paperezko dokumentazio guztia.

" Aurreko idatz-zatietan adierazitako helburuak betetzeko ekipamendu informatikoa, logikoa eta fisikoa, alderdien artean informazioa eta dokumentuak eraginkortasunez elkartrukatzeko beharrezkoa eta nahikoa izango da une oro, eta Segurtasun Nuklearreko Kontseiluak ordainduko du.

" Adostutakoa lortzeko Eusko Jaurlaritzaren eskura jarriko diren ekipamenduen erabilera, agindutako eginkizunak garatzeko beharrezko denborarako lagako zaio. Segurtasun Nuklearreko Kontseiluak ekipoen jabetzari edo titulartasunari eutsiko dio, eta Euskal Autonomia Erkidegoak, berriz, mantentzearen kostua hartuko du bere gain. Nolanahi ere, Segurtasun Nuklearreko Kontseiluak lagatako ekipamenduaren erabilera-lagapena baliogabetzeko aukera izango du une oro, guztiz edo partzialki, ekipamendu horren jabetza materiala berreskuratzeko.

Zortzigarrena.- Indarrean hastea.

Sinatzen den egunaren biharamunean hasiko da indarrean honako Akordio hau, lehen C) eta bosgarren 5.2.d), g) eta h) idatz-zatiei dagokienez izan ezik, beharrezko kudeaketa-prozedurak ezarri ondoren indarrean hasteko akta sinatutakoan indarrean hasiko direnak.

Bederatzigarrena.- Akordioa amaitzea.

Akordio honek iraupen mugagabea izango du, salbu eta Kontseiluak bere estatutuaren 11. artikulua ematen dizkion eskumenak betetzen baditu, edo salbu eta Euskal Autonomia Erkidegoak amaitutzat jotzen badu, Kontseiluari sinesgarritasunez adierazi ondoren gutxienez urtebeteko aurrerapenarekin.

Hamargarrena.- Erantzukizunak.

Segurtasun Nuklearreko Kontseiluak, agindutako eginkizunen titularra den heinean, bere gain hartzen du aginduaren eraginpeko jardueri eusteko egintza edo ebazpen juridikoak emateko erantzukizuna, eskumenaren titulartasuna ez dela transferitu kontuan hartuta. Hori guztia Euskal Autonomia Erkidegoak agindutako eginkizun guztiak betetzeko erantzukizuna hartu duela alde batera utzi gabe.

Hamaikagarrena.- Aurreko akordioak indargabetzeko araubidea.

1995eko ekainaren 28an Segurtasun Nuklearreko Kontseiluak eta Euskal Autonomia Erkidegoak sinatutako Eginkizunen Aginduaren Hitzarmena ordeztan du Aldatze Akordio honek, eta ondorengo Adenda guztiak indargabetzen ditu.

Aurreko guztia betez, eta adostasunaren frogagiri gisa, bi alderdiek Segurtasun Nuklearreko Kontseiluaren eta Euskal Autonomia Erkidegoaren arteko Eginkizunen Aginduaren Hitzarmena Aldatzeko Akordio hau sinatu dute, bi aletan, adierazitako tokian eta egunean, eta bakoitzak bere Erakundea ordezkatzuz.

Industria, Berrikuntza, Merkataritza
eta Turismoko sailburua,
BERNABÉ UNDA BARTUREN.
Segurtasun Nuklearreko Kontseiluko lehendakaria,
CARMEN MARTÍNEZ TEN.